



Jadual Pembacaan Khutbah Jumaat

Siri 3/ 2024 (Mac Tahun 2024)

Bil.	Tajuk	Tarikh
1.	REFORMASI KOREKSIONAL MEMBANGUN PERADABAN	1 Mac 2024M/ 20 Syaaban 1445H
2.	PERSIAPAN BERTEMU MADRASAH RAMADHAN	8 Mac 2024M/ 27 Syaaban 1445H
3.	SEPERTIGA MALAM ANUGERAH TERINDAH	15 Mac 2024M/ 4 Ramadhan 1445H
4.	Khutbah sempena Nuzul al-Quran: MENGHAYATI TUJUAN AL-QURAN DITURUNKAN	22 Mac 2024M/ 11 Ramadhan 1445H
5.	TAWARAN EKSKLUSIF RAMADHAN	29 Mac 2024M/ 18 Ramadhan 1445H
Khutbah Kedua		

Dibiayai oleh:



Zakat Pulau Pinang

Diterbitkan oleh:



Jabatan Hal Ehwal Agama
Islam Pulau Pinang



Jawatankuasa Panel Semakan Teks Khutbah Negeri Pulau Pinang

- 1. SS Dato' Seri Dr. Haji Wan Salim bin Wan Mohd Noor
(Pengerusi)**
Mufti Kerajaan Negeri Pulau Pinang
- 2. YBhg. Ustaz Muhammad Fadzil bin Alias**
Pengarah, Yayasan Dakwah Islamiyah (YADIM) Pulau Pinang
- 3. YBhg. Ustaz Ahmad bin Hashim**
Penasihat, Pusat Pengajian Tahfiz Al-Quran (PPTQ)
Kolej Islam Teknologi Antarabangsa Pulau Pinang (KITAB)
- 4. YBhg. Ustaz Subki bin Mohamed**
Mantan Pensyarah Kanan, IPG Kampus Tuanku Bainun
- 5. YBhg. Dr. Mohamad Zaki bin Hj Abdul Halim**
Penolong Mufti, Bahagian Fatwa,
Jabatan Mufti Negeri Negeri Pulau Pinang
- 6. YBhg. Ustazah Rohayati binti Daud**
Mantan Penyelaras Program Intervensi Kaunseling,
Universiti Sains Malaysia
- 7. YBhg. Tuan Ahmad Shahimi bin Senawi**
Pendakwah
- 8. Ustaz Mohd Hanif bin Omar @ Wahab
(Setiausaha)**
Ketua Penolong Pengarah, Bahagian Dakwah
Jabatan Hal Ehwal Agama Islam Pulau Pinang (JHEAIPP)



TAWARAN EKSKLUSIF RAMADHAN

29 Mac 2024M/ 18 Ramadhan 1445H

الْحَمْدُ لِلَّهِ الْقَائِلِ: إِنَّا أَنْزَلْنَاهُ فِي لَيْلَةِ الْقَدْرِ ﴿١﴾ وَمَا أَدْرَاكَ مَا لَيْلَةُ الْقَدْرِ ﴿٢﴾ لَيْلَةُ الْقَدْرِ خَيْرٌ مِّنْ أَلْفِ شَهْرٍ ﴿٣﴾ تَنَزَّلُ الْمَلَائِكَةُ وَالرُّوحُ فِيهَا بِإِذْنِ رَبِّهِمْ مِّنْ كُلِّ أَمْرٍ ﴿٤﴾ سَلَامٌ هِيَ حَتَّىٰ مَطْلَعِ الْفَجْرِ ﴿٥﴾

وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، شَهَادَةَ الْحَقِّ وَالْيَقِينِ فِي الْخَوْفِ وَالرَّجَاءِ. وَأَشْهَدُ أَنَّ مُحَمَّدًا عَبْدُ اللَّهِ وَرَسُولُهُ، وَمُصْطَفَاهُ وَخَلِيلُهُ كَانَ نَبِيًّا رَسُولًا.

صَلَّى اللَّهُ وَسَلَّم عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَنْوَارِ الْهُدَى وَمَصَابِيحِ الدُّجَى، وَالتَّابِعِينَ وَتَابِعِيهِمْ بِإِحْسَانٍ مَا نَهَارٌ تَجَلَّى، وَمَا لَيْلٌ سَجَى.

أَمَّا بَعْدُ، فَاتَّقُوا اللَّهَ رَحِمَكُمُ اللَّهُ، وَاسْتَعِدُّوا لِيَوْمٍ لَا يَنْفَعُ فِيهِ مَالٌ وَلَا خِلَالٌ، إِلَّا مَنْ أَتَى اللَّهَ بِصَالِحِ الْأَعْمَالِ.

SIDANG JUMAAT YANG DIRAHMATI ALLAH,

Pada hari Jumaat yang penuh keberkatan dan di bulan penuh kemuliaan, saya berpesan kepada diri saya dan tetamu Allah سُبْحَانَهُ وَتَعَالَى sekalian, marilah kita bersama-sama meningkatkan ketakwaan kepada Allah dengan bersungguh-sungguh iaitu dengan melaksanakan segala perintah-Nya dan meninggalkan segala larangan-



Nya. Mudah-mudahan kita menjadi umat contoh yang memperoleh kebahagiaan di dunia dan di akhirat kelak.

Saban tahun, Allah menganugerahkan satu bulan yang tidak pernah ada pada umat sebelum ini. Oleh itu, rebutlah seberapa banyak kelebihan dan keistimewaan yang terdapat pada bulan yang mulia ini. Elakkan sebarang perkara yang mencacat celakan bulan mulia ini yang boleh menjadi satu kesalahan jenayah syar'iah seperti meninggalkan puasa tanpa keuzuran, makan, minum dan menghidap rokok atau *vape* di khalayak ramai, serta jual beli makanan pada waktu yang tidak sesuai. Sekiranya perkara tersebut berlaku ia merupakan satu kesalahan di bawah Seksyen 15, Enakmen Kesalahan Jenayah Syariah Negeri Pulau Pinang Tahun 1996 yang membawa denda tidak melebihi satu ribu ringgit atau penjara selama tempoh tidak lebih enam bulan atau kedua-duanya. Semoga Ramadhan kali ini memberi satu perubahan diri yang positif bagi kita semua, insya-Allah.

Seterusnya mimbar pada hari ini akan membicarakan khutbah bertajuk: **"Tawaran Eksklusif Ramadhan."**

SIDANG JUMAAT YANG DIRAHMATI SEKALIAN,

Hari ini sama ada sedar atau tidak, kita telah pun memasuki fasa kedua bulan Ramadhan. Marilah kita panjatkan doa agar direzekikan nikmat umur yang berkat untuk bertemu pula dengan fasa terakhir nanti, iaitu kemuncak pelaksanaan ibadah untuk mengejar tawaran eksklusif Ramadhan.

Dalam fasa terakhir nanti, Allah **سُبْحَانَهُ وَتَعَالَى** akan mengurniakan pula satu malam yang dinamakan *Lailatul Qadr*, malam tersebut lebih baik dari



seribu bulan dengan setiap amalan kebajikan akan digandakan. Pada malam itu juga pintu rahmat terbentang luas, justeru hamba pilihan yang melaksanakan ibadah dengan penuh keikhlasan dan hanya mengharapkan rahmat Tuhan akan layak mendapat ganjaran tersebut. Firman Allah dalam Surah ad-Dukhan ayat 3:

إِنَّا أَنْزَلْنَاهُ فِي لَيْلَةِ مُبَرَّكَةٍ إِنَّا كُنَّا مُنذِرِينَ ﴿٣﴾

Maksudnya: *"Sesungguhnya Kami menurunkan al-Quran pada malam yang berkat. Sesungguhnya Kami sentiasa memberi peringatan dan amaran."*

Merujuk kepada tafsir Ibn Kathir permulaan wahyu al-Quran telah diturunkan dalam bulan Ramadhan berdasarkan firman Allah dalam Surah al-Baqarah ayat 185 yang bermaksud: *"(Diwajibkan kamu berpuasa pada) bulan Ramadhan, yang diturunkan padanya al-Quran sebagai petunjuk bagi manusia dan penjelasan mengenai petunjuk itu dan (menjelaskan) perbezaan (antara yang hak dan batil)."*

Manakala dalam Surah al-Qadr pula diceritakan kelebihan malam terindah penuh barakah iaitu *Lailatul Qadr* yang lebih baik daripada seribu bulan. Bilakah masanya *Lailatul Qadr* berlaku tetap menjadi rahsia Allah, namun kita masih mempunyai panduan hadis untuk bertemu malam penuh barakah ini.

SIDANG JUMAAT YANG DIRAHMATI ALLAH,

Jadikanlah realiti bukan fantasi kerana *Lailatul Qadr* bukan sekadar mimpi. Biar pun *Lailatul Qadr* terus menjadi rahsia, disembunyikan masa berlakunya seperti juga masa doa yang mustajab pada hari Jumaat. Hikmahnya adalah sebagai pendorong kepada hamba-Nya untuk terus

melakukan amal ibadah pada keseluruhan malam bulan Ramadhan tanpa memilih malam tertentu sahaja. Dengan harapan akan berkebetulan dengan *Lailatul Qadr* sehingga meningkatkan amal solehnya.

Maka sebagai umat Islam janganlah kita membiarkan *Lailatul Qadr* berlalu begitu sahaja, walhal kekasih kita Baginda Nabi Muhammad ﷺ sendiri menyeru umat Islam untuk mencari malam penuh barakah ini. Dalam sebuah hadis Nabi ﷺ bersabda:

تَحَرَّوْا لَيْلَةَ الْقَدْرِ فِي الْوَتْرِ مِنَ الْعَشْرِ الْأَوَاخِرِ مِنْ رَمَضَانَ

Maksudnya: "*Carilah Lailatul Qadr pada malam ganjil daripada sepuluh malam terakhir bulan Ramadhan.*" (Hadis Riwayat Al-Bukhari)

MUSLIMIN RAHIMAKUMULLAH,

Majoriti ulama' berpendapat bahawa *Lailatul Qadr* berlaku pada malam-malam sepuluh yang terakhir di bulan Ramadhan. Ini bersandarkan kepada banyak hadis Rasulullah ﷺ. Sebahagian berpendapat ulama' berpendapat bahawa *Lailatul Qadr* akan berlaku pada malam-malam yang ganjil daripada sepuluh malam ini iaitu pada malam 21, 23, 25, 27 dan 29 Ramadhan. Lantaran itu beruntunglah bagi sesiapa yang memperolehinya dan rugilah sesiapa yang hanya menghabiskan malamnya dengan aktiviti yang tidak berfaedah seperti melepak, melayari media sosial dengan kandungan yang lagha dan seumpamanya.

Seandainya Ramadhan yang lalu kita hanya menjadi nujum pak belalang kerana terleka menilik tarikh sehingga amal ibadah ke laut, maka Ramadhan kali ini kita mengharapkan semoga Allah ﷻ



mengurniakannya kepada kita. Elakkan sikap suka bertangguh dalam mengerjakan kebajikan. Firman Allah dalam Surah Ali Imran ayat 133:

وَسَارِعُوا إِلَىٰ مَغْفِرَةٍ مِّن رَّبِّكُمْ وَجَنَّةٍ عَرْضُهَا السَّمَوَاتُ وَالْأَرْضُ أُعِدَّتْ لِلْمُتَّقِينَ ﴿١٣٣﴾

Maksudnya: *"Dan bersegeralah kamu mengerjakan amal kebaikan untuk mendapatkan keampunan daripada Tuhanmu dan syurga yang luasnya seluas langit dan bumi yang disediakan bagi orang yang bertaqwa."*

SIDANG JUMAAT YANG DIKASIHI SEKALIAN,

Seterusnya pula di antara amalan Rasulullah ﷺ apabila memasuki fasa terakhir Ramadhan ialah sepertimana hadis yang diceritakan oleh Saidatina Aisyah رَضِيَ اللَّهُ عَنْهَا yang bermaksud:

"Adalah Rasulullah apabila masuk malam sepuluh terakhir Ramadhan, Baginda akan mengetatkan kainnya, menghidupkan malam tersebut dan mengejutkan ahli keluarganya (untuk turut menghidupkan malam)."

(Hadis Riwayat Al-Bukhari)

Berdasarkan mafhum hadis ini, apabila tiba pada 10 malam terakhir Rasulullah akan melaksanakan ibadah dengan bersungguh-sungguh dan Baginda juga tidak menggauli isterinya kerana ingin memberi tumpuan sepenuhnya kepada ibadah.

SIDANG JUMAAT YANG DIRAHMATI ALLAH,

Seandainya kita mengimbas kembali fasa awal Ramadhan yang telah berlalu, adakah kita masih ingat betapa bersemangatnya kita untuk

beribadah. Namun setelah berada di pertengahan Ramadhan ini, ke mana hilang semuanya itu? Ayuhlah para jemaah sekalian, marilah kita berusaha meningkatkan amal ibadah bagi mengukuhkan iman dan berjaya mencapai darjat taqwa. Kita ikhlaskan niat semasa beribadah dengan hanya mengharapkan keredhaan Allah dan tinggalkanlah sementara keseronokan dunia. Beriktikaf dan beribadahlah di masjid serta mengajak ahli keluarga untuk sama-sama berqiyamullail.

Dalam sebuah hadis yang diriwayatkan oleh Imam al-Bukhari, Rasulullah ﷺ bersabda maksudnya: *"Sesiapa yang menghidupkan Lailatul Qadr dengan penuh keimanan dan penuh pengharapan, akan diampuni dosa-dosanya yang telah lalu."*

Justeru antara bentuk amal ibadah yang boleh dilakukan bagi menghidupkan Lailatul Qadr ialah dengan mengerjakan solat Isyak berjemaah, memperbanyakkan doa memohon keampunan, solat Terawih serta membaca al-Quran. Seterusnya banyakkan berdoa sepertimana hadis yang diriwayatkan oleh Imam at-Tirmizi daripada Saidatina Aisyah رضي الله عنها maksudnya: *"Aku bertanya, ya Rasulullah jika aku mengetahui bahawa malam itu adalah Lailatul Qadr, apa yang sepatutnya aku ucapkan? Rasulullah bersabda, ucapkanlah:*

اللَّهُمَّ إِنَّكَ عَفُوفٌ تُحِبُّ الْعَفْوَ فَاعْفُ عَنِّي

Maksudnya: *"Ya Allah sesungguhnya Engkau Maha Pemaaf, suka memberi kemaafan, maka maafkanlah aku."*

SIDANG JUMAAT YANG DIRAHMATI ALLAH SEKALIAN,

Sebagai mengakhiri khutbah pada hari ini, marilah kita menghayati intipati penting daripada peristiwa *Lailatul Qadr*:

Pertama: Kita perlu sentiasa bersyukur kerana masih lagi diberi peluang untuk mengabdikan diri kepada Allah ﷻ pada 10 terakhir Ramadhan yang bakal menjelang.

Kedua: Allah sengaja merahsiakan tarikh sebenar berlakunya *Lailatul Qadr* agar kita berusaha mencarinya dan melakukannya pada setiap masa.

Ketiga: Kita tidak dapat menjamin umur kita untuk bertemu dengan Ramadhan akan datang. Maka, rebutlah kemuliaan malam al-Qadr dengan bersungguh-sungguh memohon keampunan dan keredhaan Allah.

Firman Allah ﷻ:

يَا أَيُّهَا الَّذِينَ ءَامَنُوا اتَّقُوا اللَّهَ وَكُونُوا مَعَ الصَّٰدِقِينَ ﴿١١٩﴾

Maksudnya: “Wahai orang yang beriman, bertaqwalah kamu semua kepada Allah dan hendaklah kamu bersama-sama orang yang benar (baik)!” (Surah at-Taubat ayat 119)

بَارَكَ اللَّهُ لِي وَلَكُمْ فِي الْقُرْءَانِ الْعَظِيمِ، وَنَفَعَنِي وَإِيَّاكُمْ بِهِدْيِ سَيِّدِ الْمُرْسَلِينَ،
أَقُولُ مَا سَمِعْتُمْ، وَأَسْتَغْفِرُ اللَّهَ لِي وَلَكُمْ، وَلِسَائِرِ الْمُسْلِمِينَ مِنْ كُلِّ ذَنْبٍ،
فَاسْتَغْفِرُوهُ، إِنَّهُ هُوَ الْغَفُورُ الرَّحِيمُ.



Khutbah Kedua Bulan Mac

2024M/ 1445H

الْحَمْدُ لِلَّهِ عَلَى آلَائِهِ وَإِحْسَانِهِ، وَالشُّكْرُ لَهُ عَلَى تَوْفِيقِهِ وَامْتِنَانِهِ،
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ تَعْظِيمًا لِحُشْنِهِ،
وَأَشْهَدُ أَنَّ مُحَمَّدًا عَبْدُهُ وَرَسُولُهُ دَاعِيًا إِلَى رِضْوَانِهِ.
صَلَّى اللَّهُ وَسَلَّم عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ، عَدَدَ خَلْقِهِ وَرِضَا نَفْسِهِ،
وَزِنَةَ عَرْشِهِ وَمِدَادَ كَلِمَاتِهِ.
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ تَعَالَى رَبَّكُمْ حَقَّ تَقَاتِهِ، وَاعْمَلُوا بِطَاعَتِهِ
وَمَرْضَاتِهِ، ثُمَّ اْعْلَمُوا أَنَّ اللَّهَ سُبْحَانَهُ وَتَعَالَى أَمْرُكُمْ بِأَمْرِ بَدَأَ فِيهِ بِنَفْسِهِ؛ فَقَالَ عَلِيمًا
حَكِيمًا:
إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا

﴿الأحزاب: 56﴾

اللَّهُمَّ صَلِّ وَسَلِّمْ عَلَى عَبْدِكَ وَرَسُولِكَ مُحَمَّدٍ نِ الْبَشِيرِ النَّذِيرِ، وَالسَّرَاجِ الْمُنِيرِ،
وَارْضَ اللَّهُمَّ عَنِ آلِهِ وَصَحَابَتِهِ أَجْمَعِينَ، وَعَنِ التَّابِعِينَ، وَمَنْ تَبِعَهُمْ بِإِحْسَانٍ
إِلَى يَوْمِ الدِّينِ، وَعَنَّا مَعَهُمْ بِعَفْوِكَ وَكَرَمِكَ وَإِحْسَانِكَ يَا أَرْحَمَ الرَّاحِمِينَ.

SIDANG JUMAAT YANG DIRAHMATI,

Dalam kesempatan ini, mimbar ingin menyeru agar sama-sama kita menjadikan keselamatan diri, keluarga dan pengguna jalan raya yang lain sebagai keutamaan di sepanjang musim perayaan



terutamanya pada perayaan Aidilfitri yang akan kita sambut dalam sedikit masa lagi.

Menjaga keselamatan jalan raya dan berusaha mencegah dari berlakunya kemalangan jalanraya adalah sebahagian daripada *Maqasid Syariah* dalam aspek pemeliharaan nyawa dan harta.

Justeru kita mestilah berusaha dengan pelbagai cara untuk mengurangkan risiko dan mencegah daripada berlakunya kemalangan jalan raya sepertimana Allah berfirman dalam Surah Al-Furqan, ayat 63 yang bermaksud:

“Dan hamba-hamba (Allah) ar-Rahman (yang diredhai-Nya), ialah mereka yang berjalan di bumi dengan sopan santun dan apabila orang-orang yang berkelakuan kurang adab, hadapkan kata-kata kepada mereka, mereka menjawab dengan perkataan yang selamat dari perkara yang tidak diinginkan”.

Muslimin dan muslimat juga diingatkan agar tidak melakukan 7 kesalahan utama lalu lintas iaitu memotong barisan, memotong di garisan berkembar, tidak mematuhi isyarat lampu merah, memandu melebihi had laju, menggunakan telefon bimbit semasa memandu, tidak memakai tali pinggang atau topi keledar dan memandu di lorong kecemasan. Allah سُبْحَانَهُ وَتَعَالَى melarang para hamba-Nya yang beriman.”

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ،

اللَّهُمَّ أَعِزَّ الْإِسْلَامَ وَالْمُسْلِمِينَ، وَدَمِّرْ أَعْدَاءَكَ أَعْدَاءَ الدِّينِ وَانْصُرْ مَنْ نَصَرَ الدِّينَ، وَاخْذُلْ مَنْ خَذَلَ الْمُسْلِمِينَ، وَأَعْلِلْ كَلِمَتَكَ إِلَى يَوْمِ الدِّينِ.

اللَّهُمَّ انْصُرْ إِخْوَانَنَا الْمُسْلِمِينَ وَالْمُجَاهِدِينَ وَالْمُسْتَضْعَفِينَ فِي فَلَسْطِينَ وَفِي كُلِّ مَكَانٍ، اللَّهُمَّ ثَبِّتْ إِيْمَانَهُمْ وَأَنْزِلِ السَّكِينَةَ فِي قُلُوبِهِمْ وَوَحِّدْ صُفُوفَهُمْ.

اللَّهُمَّ وَفَّقْهُمْ لِمَا فِيهِ عِزُّ دِينِكَ وَنَصْرُ شَرِيعَتِكَ، اللَّهُمَّ اجْعَلْهُمْ هُدَاةً مُهْتَدِينَ
صَالِحِينَ مُصْلِحِينَ وَاشْمَلِ اللَّهُمَّ بِعِنَايَتِكَ وَتَوْفِيقِكَ عَلَى صَاحِبِ الْجَلَالَةِ،

Kebawah Duli Yang Maha Mulia Seri Paduka Baginda Yang di-Pertuan Agong, Sultan Ibrahim dan Kebawah Duli Yang Maha Mulia Seri Paduka Baginda Raja Permaisuri Agong, Raja Zarith Sofiah.

وَكَذَلِكَ صَاحِبِ الْفَخَامَةِ،

Tuan Yang Terutama, Tun Dato' Seri Utama Ahmad Fuzi Bin Haji Abdul Razak, Yang di-Pertua Negeri Pulau Pinang.

اللَّهُمَّ ادْفَعْ عَنَّا الْبَلَاءَ وَالْوَبَاءَ وَالْغَلَاءَ وَالرِّيَاءَ، وَالرَّبَا وَالزُّنَا وَالزَّلَازِلَ وَالْمِحْنَ وَسُوءَ
الْفِتَنِ مَا ظَهَرَ مِنْهَا وَمَا بَطَنَ عَنْ بَلَدِنَا هَذَا خَاصَّةً، وَعَنْ سَائِرِ بِلَادِ الْمُسْلِمِينَ
عَامَّةً يَا رَبَّ الْعَالَمِينَ.

Ya Allah! Dengan sifat-Mu yang Maha Pemurah dan Maha Mendengar, jadikanlah kami dan keturunan kami orang-orang yang istiqamah mendirikan solat secara berjemaah serta dapat mengeluarkan zakat dan melaksanakan waqaf melalui agensi milik penuh Majlis Agama Islam Negeri Pulau Pinang (MAINPP) iaitu Zakat Pulau Pinang (ZPP) dan Wakaf Pulau Pinang (WPP).

Ya Allah! Berilah petunjuk-Mu kepada kami dan pemimpin-pemimpin kami untuk memberikan khidmat bakti yang terbaik kepada agama, bangsa dan negara. Ya Allah! Kuatkan iman kami agar dapat menghindari perbuatan khianat, salah guna kuasa dan harta, memberi atau menerima rasuah dan segala perbuatan durjana yang merosakkan kepentingan agama, masyarakat dan negara.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.

عِبَادَ اللَّهِ! إِنَّ اللَّهَ يَأْمُرُ بِالْعَدْلِ وَالْإِحْسَنِ وَإِيتَايِ ذِي الْقُرْبَى وَيَنْهَى عَنِ الْفَحْشَاءِ
وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ ﴿٥٠﴾ فَادْكُرُوا اللَّهَ الْجَلِيلَ

يَذْكُرْكُمْ، وَاشْكُرُوهُ عَلَى نِعَمِهِ يَزِدْكُمْ، وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ ﴿٤٥﴾